



KBC/Thuso

So493

Regd.No.19134/88
<http://www.kbc.org.in>
NAI/220/99
No-G-4/Regd.Magazine
/KBCThuso/MNP-81

Kum 57 Ihinna

Lhadou/June 2020



PATE MOPOHNA

CHRISTIAN NATOH

JULY EVENTS

Half yearly Audit - 6-9
Youth employee Day - 12
Anthah lop - 19

"Kapa theng, ini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



KBC Centre Church Sangaikot Hou in Thah kisah chaito kilhon a Pathen angung a kothon doh na thupitah leh Silver Jubilee kilom tah in ana kinei tan ahi.



CONTENTS

THUMAKAI HO

1. Khat le khat salaam kiboh/ <i>Editorial</i>	2
2. THINGLHANG GAM MAN LUTNA/ <i>Rev. Onkho Haokip</i>	4
3. PATHEN THILSEM MANLUTAH/ <i>Pr. T. Jamthienlal</i>	8
4. COVIT-19 HETDIA POIMO PHABEP/ <i>Dr.</i>	10
5. Mission Column	14
6. Men Column	17
7. Youth Column	21
8. 90th KBC EXECUTIVE COUNCIL	23
9. LHAGAO HINKHO PUI HING THEI THUGOLHO	24
10. REPORTS	38

EDITORIAL BOARD

<i>Chairman</i>	: <i>Rev. Tonglet Haokip, President KBC</i>
<i>Editor</i>	: <i>Dr. M. Thongkhosei Haokip, General Secretary</i>
<i>Joint Editor</i>	: <i>Rev. Onkho Haokip</i>
<i>Contributing Editors</i>	: 1. <i>Rev. Thongkholun Touthang</i> 2. <i>Rev. Lamkeng Lhouvum</i> 3. <i>Rev. Tongmang Haokip</i> 4. <i>Ms. Tingneihing Kipgen</i> 5. <i>Rev. Lunkhosei Tuboi</i> 6. <i>Rev. T. Thangkhosei Haokip</i>
<i>Layout, Design & – Pu Lenboi Haokip</i>	
<i>Circular Manager</i>	
<i>Recorder – Ms. Nemhoichong Haokip</i>	

THUSO LAHMAN

Church/Organisation/ DepartmentRs. 300/-

Individual Rs. 200/- (Post a Rs. 250/-)

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Indian Overseas Bank, Imphal Branch

A/c No. 073201000000350

IFSC No. IOBA0000732

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



“Khat le khat salaam kiboh touvin lang thengtah in kichop-un”

(Greet one another with a holy kiss)

Editorial

Thumakai:

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Tulha thupi chu “Pa te Mopohna” ahi. Hijong le tulaiya Covid-19 natna his elan jeh hin i houbung leh lhangpi hinkhoa sahphat ding tampi lah a chung a kisei thupi hi jong poimo tah khat in kagelin ahi. Hiche article ah hin Kuki Christian te lah a khat le khat ki salaam to thudol themkhat itahlang nomun ahiye.

Khat le khat ki salaam to kitihi thilphatah chu ahi kiti le seival hiponte. Culture le nam jat chomchom hon amaho chondan dungjuiyin achom chom neikhat unte. Bible kisutlai ahideh a solchah Paul khanglai ya jong thil hoitah le phatah a kibol Anahi ltheh in akihei. Hijeh a chu chung a kitahlang thu hi ahung hitai.

Paul in khat le khat salaam kibohtoa kichop ding Thulhun Thah a vei 5 aseiyin, hiche lah a 4 vei jen hi thengtah a kichop ahilou le kichop theng tin ana minphah in (Rom. 16:16; 1 Cor. 16:2; 2 Cor. 13:12; 1 Thess. 5:26), chule khat vei hi ngailutna a kichop tin aminphah e (1 Pet. 5:14). Hiche thupeh ho hi alhangpia Rome, Corinth chule Thessalonica khopi lah a ana hil chu ahi.

Greek thucheng Philema kitia pat a hung kiladoh kichop thucheng hi ahi. Hichehi Philos kiti (golcha) ahin, Phileo (golcha kingailut-na) a kona Philema (golcha kingailuho akama abeng ahiloule akhutphang ahiloule akeng achop) ti ahung hie. Hiche ho chu huh-man hilouva ngailutna Thenga kichop tia ana hil chu ahi. Hichun golcha hina le khat le khat kisahtona, kihomthomna avetsah ahi.

Masang laiya kichop hi khat le khat kilemtona a kimang ahi ti akicheh e. Jacob in Isaac alemna a achop (Gen. 27:26-27); David le Jonathan kilhahna a kichop (1 Samuel 20:41-42); vaihom hoa kona khotona mutheina dinga akhut chop (Psalm 2:12; 2 Sam. 14:33); inneipa'n ajinpa lemna a achop (Luke 7:45); Judas in Jesu achop (Luke 22:47-48) kitio ahiuve.

Bible a kichopto kiti jong le eiho chondan (culture) a miji-micha toh kichop kibol lou ahitoh kilhonin eiho gama lhumlam gama kona kipana thupha ihinmu utoh kilhona tulaiyin kichop khel a khut le khut kituhto (handshake) kitio ihin chepiu chu ahitai. Hichehi eimaho chondan a jong kigela kichepi jing chu ahitan, aphatah le adih tah a kigel chu ahi.

Hijongle, tulaiya damlouna chom chom TB, HIV-AIDS, chule ahi-deh set a Covid-19 kitio hi kinaicha a um le khut le khut kituh-tona a kona kiladoh theiya ginchat ahijeh in government a kona hitobang kikhut santona ima umсах lou ding tiho thupeh ahung um tai. Among in jong Japan gama kikhut santo louva aumu jong jonghi tuchung coronavirus amaho gama apunlouna jeh in aki-seiye. India gam jong kikhut santo hi anaumbek louva galkanga salaam (namaste) kitia anachepiu chu anahi. Tukhang joh a India mite jong lhumlam gam ho bolbanga ahinhabol lleh danun akimui.

Hitobang ahung lhun tah toh kilhonna kivenna phapen loiya kisei chu, ipotdoh le muhtom (mask) kitoma, ikhut tui le sabona kisiljinga, milah a napnit ahilou le chilset mohbol louva, mito jong kinaibek seh a toukhom-dinkhom louva, kikhut santo sanga kilemtona adang bol ding tiho hi chondan pha le eima keo hilouva midang dinga kivenna phatah hidingin ginchat ahi. Hichehi houbung lah hihen kikhopna munho lah a jong chepi ding hi tu le khonunga dinga damtheina le machaalna hinte. Lungluttah a simho jouse chungu Pathenin phatthei boh cheh tauhen.

THINGLHANG GAM MAN LUTNA



Rev. Onkho Haokip
Development Co-ordinator

ARTICLE

Bible hi thingphung kiminphahna dimset lekhabu ahi. Bible lekhabu masapen, Semtilbu (Genesis) bung khat akon in thingphung hihen gam le go chung chang hileh akiminphah pan tan ahi. Bible sei dungjui in Pathen in, *“leiset hi hampa, amunei hamphung, agathei thingphung, aga achi ding’a amunei cheh, ama ama chi dungjui cheh in hin sepdoh hen lang leiset chung’a hung kehdoh uhen,”* atileh, hiti chun ahung kehdoh tauve. ... Pathen in avet leh apha lleh jeng in ahi (Gen.1:11-12). Bible a lekhabu nunungpen Thuphon (Revelation) bung nunungpen ajong thingna louna ahideh in thingphung thu nasatah in aseiyin ahi. *“Chule lui dung chu apang langtoa hin thing keh ahin, aga jat chom chom somleni ga a, alha she’a ga jing jeng ahi, chule thingnaho chu namtin vaipi boldam’a ahi,”* (Rev. 22:2).

Jesu Christa hinkho jong thing toh akisamkaina tamtah ana um in ahi. Thingthem bol anahin thing umdan hethem mama hiding ahin theiba phung thu ana seiyyin, Geth-semame hon’a thingphung lah’a ana tao jing in chule thingchung’a ana kikhai lih in ahi.

Hicheho jouse in avetsah chu eiho tahsanna hi lhagao lam thu jeng hilouva Pathen in eipeh'u vannoi nei le gou umho toh chengkhom dan le venbit dan jong jao ahi. Eiho jouse hi vannoi akon'a lhatdoh jengseh hilouvin Pathen in angailut vannoi (Jn.3:16) vengbit ding'a jong huhing chang ihiuve. Jesu nungjui eiho ding'a mopohna chu vannoi mihemte, thingna louna, ganhing namkim le thilsem jouse in asempau Pathen loupina aphondoh theina ding uva panlah ding hi ahi. Psalm 96:12-13 chun, *"lou-jao jong kithang at hen, asung'a keh jouse kithang at hen, chuteng- gleh gammang thing jousen kipa la asah diu ahi. Pakai ahung'e, amasang'a hitia chu um ding ahi. Ajuh chu ama leiset thutan din ahung'e. Aman vannoi leiset thu adih'a atan ding, chitin namtin jong dihtah'a abol ding ahi,"* ati.

Hetgilna neiho in vannoi thingna lounaho akisuhmang jing jeng hin vannoi pumpi ding'a natna le hahsatna ahin pohlut ding thu akum kum in ahin sei jing tauvin ahi. Mihem damtheina, ganhingho damtheina le gamlego damtheinaho jouse hi abon'a akiguijopna thutah um ahi. Eihon gammang umho isuhset teng uleh gamsaho ahung vah doh uvin khopi sung'a ahung lut thei uvin chule gamsa tamtah in thina ana toh ji uvin ahi. Chule mihemte achih thei lou uleh

gamsa neh jeh'a ganhing natna hoise jatchom chom akilah lut thei'u ahi.

Forest Survey of India, kholdoh jungjui in India gamsung hi 21.67% tobang bou hi gammang aum tan ahi. Haryana le Punjab gam sung vang 4% sang'a neojo gammang aum in ahi. India sahso gamkaiho vang 70-90% tobang gammang aum nalaiyin ahi. Mihem apunbe jing'a chule khopiho akisuhletbe jing lai chan in gam-mangho aneo cheh cheh in chule gamsa le ganhingho jong amang cheh cheh uvin ahi.

India gam sung'a cheng mihem mi nga lah'a mi khat hi thinglhang gam'a kihinsona amu ahin India Sarkal in thinglhang le gam-mangho nasatah'a suhletbea 33% chan phahsah ding angaito jing in ahi. Hichea hin sumlepai lam khantousahna ding'a natongho in gamsung thilho angaichatna le Forest Department in gamsung thilho suhtup ding atiuhi akinelto jing nalaiyin ahi. Eiho Christiante in gamsung'a thingna louna le ganhingho hi itidol'a ivet uva chule Pathen ihounauva ichangeiya ikhohsah ding'u ham tihi Bible akon'a vetchil angaichatna aum jing in ahi.

• GAM SUNG HI PATHEN'A AHI.

Adih tah chun vannoi leiset le asung'a um jouse hi Pathen'a ahin, hiche chun gamsung jong aseina ahi (Psalm 24:1). Hiche jeh chun gammang ineihouhi sumlepai holna mai mai chule eiho that thei natna hungkon dohna mai maiya lah thei ahipoi. Psalm 50:10 chun *"gammang lah'a sahem le gan-cha jouse keiya ahi,"* tin aseiyin ahi. Vannoi pumpi ding'a gammang umhohi gamsaho le lou le ai kimuna munpi ahin, eihon hiche gammangho isuhset uva isuhmang jinglai chan uva mihem hinkhoa angaichaho isuhset uva chule Pathen thilsem isuhsetnauva hung pang ahi.

Hiche vannoi leiset hi mihemte ding bouseh'a kisem ahi tia sei thei ahipoi. Colossians 1:16 achun, *"thil ijakai hi Ama jal le ama ding'a kisem ahi,"* atin ahi. Hiche hin vannoi'a gammangho jong ahopt ha ahi. Hou lamkaiho, nulepate hihen akoi kihijongleh Pathen in vannoi leiset asem hi mihemte hinna ding le chenna ding ahin ahinlah moh suhset set ding le moh man chat vai ding ahipoi tihi hetthem cheh ngai ahi.

• GAMMANG SUHMANGNA A KISIH DING AHI.

Gammang suhmang hi chonset ahitia kiseihi kidangsa thei tah ahi. Alhangpi in chonset akitileh se le pha thua ilhahsamnahou sein in

akila in ahi, ahinlah adihtah chun Pathen bidoi suhset le Pathen amatah akiphondohna nahsalou chule Pathen in vannoi'a um ding'a adeiho suhmang kitiho jong hi chonset hi ding ahi. Thingphung phuhl-huh kitihi chonset moh hijeng ponte, ahinlah alamlou ahilouleh venbitna thei lampi aum vang'a phuh tei tei kitihi adihlou ahi. Thingphung khat chu phatah'a ahung pilhin leh hiche achun jucha vacha in kihinsona anei thei uvin, leiset atuhchah in, mitemte ding in hui asutheng in, aga akon in neh le chah apengdoh in, go le dai asemdoh in, lei thao asemdoh in, chule lou le ai asepdoh in ahi. Thingphung khat sehseh in mihem tamtah le ganhing tamtah hinkho asemdoh jou ahi.

Vannoi ahin *second* ni seh in *football ground* khat tebep bep gammang akisumang jing'e tin ahgilhon aseu uvin ahi. Hiche gammang kisumangho hi angaikhoh jeh'a kisumang jong aum nan ahinlah atamjo hi angaikhoh lou le eima chang kingailut jeh'a kisumang ahidan jong ahgil hon aseu uvin ahi. Gammang suhmang hin ikimvel'a Pathen thilsem thingna louna le ganhingho toh eisuhgamlat'u ahin chule Pathen thilsem kisuse ahijeh'a Pathen toh jong eisuh gamlatnau aum theiyin ahi (Rom. 1:20).

**• GAMMANG AKON PHAT-
THEINAHO KIPAPI A PA-
THEN HOUNA NEI DING
AHI.**

Semtilbu (Genesis) 1:29 chun Pa-then in leiset chung'a muchi ag-athei jouse le thing gathei jouse mihemte ding'a apehdoh ahidan akimun ahi. Gammang le asung'a umho Pathen'a hijeng jongleh hicheho jouse hi Pathen in mi-hemte neh le chah ding'a apehdoh ahi. Hicheho jeh in vannoi mi kim-khat in thingphung songphungho ahou uvin chule abohkhup jiuvin ahi. Amaho in thil jouse sempa hou louva thisemho ahou'u ahin adihmo lleh jeng chu ahi (Jer-emiah 10:3-5).

Pathen hi mihemte ding'a damtheina, hintheina, chenna le ijakai eipepau ahibang'a Thing-phungho jong hi kiselna le kihin-sona theiya aumna tamtah aum in ahi. Isaiah 55:12 achun *'thingp-hungho chun Pathen thu nitna in khut ana beng uvin'* Psalms 148:9 achun *"thinga le cedar thingp-hungho"* chule thilsem dangho chu Pakai thangvah ding in ana kitilkhoh uvin ahi. Christiante hin thilsemho jouse jaona le gammang sung'a muchiho jouse jal'a Pathen ihou uva ithangvah vah thei'u ahi.

Eima inmun le houin mun'a jong muchi le thingphung ijakai phu-bebe thei ahin chule eima pen

nikho hihen nikho loupí dang dang hijongleh thingphu phunaa man thei ahi.

**• GAMMANG LE ASUNG'A
UMHO VENBITNA LE SUH
CHATVAI LOUNA DING'A
PANLAH DING AHI.**

Pathen in eipeh'u gammang umho le asung'a thil umho hi chintup le gangahojouse suhchatvai lou ding hi thil loupí hiding ahi. Gammang sung'a thingphungho moh suh-mangho aphantlou jengseh hilouva gammang sung'a thil loupí tahtah umho le gamga umho phatah'a venbit ding hi thil loupí tah ahi. Hiche hi seijui hina kiphondohna khat jong hiding ahi. Lekha sem-na ding'a thingphung akiphuh jong leh akiphuhlhu sang'a tamjo phube ding ahi. Chule in sung'a kimang cha thing'a kitem thilho jong ahitheí channa akimoh mumu lou thingho hilouva, thing keh bai le thing manlhomho akon alhouna theipen'a semdoh ding joh thilpha ahi.

Gammang le pahcha lei vil'a cheho injong thingphung le pah-chaho sat lhah le suhset hilouva lim kilahpi le agam dinmun kipapi jeng ding bou ahi. Deuteronomy 20:19-20 sung ivetleh Israelte in gamtep gam alo'u thusim akimu in ahi. Amaho chu gamsung'a thingphung songphungho chu amanchah thei ding uvin akiphah

peh uvin ahi. Ahinlah thinga hihen thing le song dangho jong ajehbeiya amoh phuhlulhuh luh lou ding uvin thupeh ana um in ahi. Bible a mun phabep a Pathen thilpeh athilsemho jabolna le kihinsona ding'a manchah ding'a kiseina mun khat ahi. Eihon Pathen thilsemho jabolna'a athilsemho jong ijabol uva chule amanchah dan ithep'u ngai ahi.

• GAMMANG INEIHOU HUH-BITNA DING'A PANLAH DING AHI.

Gammang ineihou mantamtah ahijeh in gamsung'a chengho aman dan thep cheh ngaicha mama ahi. Gamsung'a lamkai chomchomho in sumlepai muna ding hihen thil dang dang jeh hijongleh gammang umho suhbeina ding le lahman-gna ding'a pan alah uleh gamsung mipi in phatea houlimpia mipi ding gelna'a anatoh'u asuhai ding'u hi thil loupitah hiding ahi. Mi kimkhat in gam sung'a sa le nga umho sumkolveina le suhmangna tohgon anei leh hiche jong chu bolsahda'a thilpha tah hiding ahin vannoi vah'a ana pang ding chu Christiante ana hiding mong ahi. Christiante hi kisuhgentheina mun hihen, min agotchepho hihen gamsung thu hileh aphaat dungjuia paodoh dingho chu ahiuvin ahi. Rom 8:22 achun vannoi thilsemho hi lhatdoh nikho ngaicha'a peng peng'a um ahidan'u ase in ahi.

Eiho hi vannoi pumpi kihinsona thei thil manlu umna gammang huhtupna ding'a ding doh ding'a kou ihiuvin ahi. Eihon gammang hi Pathen nei le gou ahi ihetchen uva, hiche gammang le thingphungho hi eihon ikipapiuva, akhan hoina ding'a avengbit'a ipan uva chule gamsung damtheina ding'a pan ilahkhom ding'u hi thil thupitah hiding ahi. Martin Luther chun, *"Jing nikhoa Jesu hung kile ding hijongleh tunia thingphung khat ka phube nalai ding ahi,"* anatin ahi. William Carey chun Pathen thu anaseiya pao tamtah'a Bible analedoh titah louvin India gamsung'a thingphung songphungho chungchang lekhabu jong ana sodoh in ahi.

Pathen in aphusa gamsung'a thingphungho venbitna'a pan ilahkhom cheh uleh labolpa labol isahkhom thei ding'u ahitai: *"lou-jao jong kithang at hen, asung'a keh jouse kithang at hen, chutengleh gammang thing jousen kipa la asah diu ahi. Pakai ahung'e, amasang'a hitia chu um ding ahi. Ajeh chu ama leiset thutan din ahung'e. Aman vannoi leiset thu adih a atan ding, chitin namtin jong dihtah'a abol ding ahi,"* (Psalm 96:12-13).

-Development Coordinator

PATHEN THILSEM MANLUTAH LEISET



*Pastor T. Jamthienlal Haokip
Faculty, Shalom Theological Seminary.*

Sermon

“Lekha nahasim loule genthei tah a lou nalho a nakihinso ding ahi.” Hiche thuguol hi lekhasim ho tilkhouna dinga thuchih dan a inei jingu khat chu ahi. Hiche hin loulho ahiloule leiset limbol le phatbol akon a nehle chah kihol hi gentheina lah a gentheina lenpen chule gaosapna ‘curse’ dan a igel uvin aumin ahi. Hitia leiset le kigaosap samkaina lunggel inei naova kon a ikinungle uva leiset manlut dan hi athah a igeldoh diuhi ikideisah uvin ahi.

Genesis bung 2 le 3 ivet a hile leiset (English paova ‘earth’ chule Hebrew paova ‘adamah’) hi Pathen thilsem lah a dinga abulpi pen ahidan akimuthei in ahi. Hilai simmun hin leiset hi imajouse hung kondohna le kisemdohna ahidan asei in ahi – mihem kisemdoh na ahin (2:7), thingkeh, hamhing, pahcha ho hungkon dohna ahin (2:9), chule lei a vah gancha le chungang leng vacha ho kisemdoh na ahikit in ahi (2:19). Leiset hi hiche thilsem thusim ahin athupi pen ‘central figure’ in apang in ahi.

Aban in mihem hole leiset aki-mat na ‘relation’ 3 seithei in aumin ahi. Akhatna in mihem chu leiset apat in akisemdoh in ahi (2:7). Anina in mihem athi teng

leiset a kinungle a leiset kiso-ding ahi (3:19). Athumna in mihem leiset apat akisemdoh le athi a leiset a akinungle kikah a leiset a phatbol, alimbol, alho a hiche a chu kihinso ding ahi

(2:15). Hiche hin mihem ho leiset a kingai 'dependent' ahinao le leiset bei a ima ahilou dan avetsah in ahi. Chule Pathen in mihem ho mopohna/ngansena/tohding apeh masatpen chu ipi ham iti a hile Eden huon sunga huonlei bol dingle angah a panding tihi ahi.

Bible hi ivet a hile Pathen in achate ngansena thupipen 'The Great Commission' (mihem ho seijui a semding) apeh masangin ngansena masapen 'The First Commission' (huonlei bol dingle leiset ventup ding) hi anaum tan ahi. Hiche ngansena masapen hi mihem khat dinga hinna bulpi 'basic foundation' chu ahi. Hiche bulpi geldaothei ahiloudan chu tukum March lha a Covid19 jeh a ichennaogamsunga 'lockdown' umding ahung kiphondoh chun koiman neile gou, von le lo aboipi pon ahi, hinna dingin nehle chah, anche louhing, bu le me bou aboipi in ahi. Masanga imalouva kigel nehthei चाह्त्थै, bule me hojong chu 'lockdown' sungin homtho tah in akine in hitobang imuthei jongchu vangpha ikisakhop mai uvin ahi.

Mihem hon hiche 'relationship' ihetthem lou jeh uvin Pathen thu toh kitoh louvin na itong uvin khonunga hahsat nading le genthei nading tampi

ikiboldoh uvin ahi. Leiset hi Pathen in aloupina phongdoh dingle ahingthei ho jouse dinga kihinsona dinga asem ahi. Pathen in ajeh nei a thupi tah a asemna 'intrinsic worth' sangin sum sotheina 'commercial worth' joh ikhohsahjo taovin ahi. Hiche hin leiset hi Bible a kisei banga amanlut nale athupina ho sangin nopnop lothei thilkeu lokeu 'commodity' dan in igel sah taovin ahi.

Leiset hi sum sothei nadinga nop nop lothei thilkeu lokeu dan a igel jeh uvin thinglhang lang ah kani 'poppy' itu uvin ikisaboi uvin, thingphung tampi iphulhu uvin, lei le song tampi iladoh uvin, thinglhang gam hoitah le nomtah ho isuse uvin, chule phailei ho isumang taovin ahi. Hiche hin khonunga kihinso nadinga angaicha nehle chah, go le dai, chule huinun nisat ho hatah a ahin suhboi dingin aumin ahi. Hitobang boina ho igal-mu uva kona tuahi ikisemphat lou uva hile khonunga hung seilen dingho Pathen thule chonphat lama iti ikhoukhah diu hitam? Leiset manlut dan hi tukhanga eihon ihet uva, ahiding banga ilimbol uva hile Pathen thu toh akito naban a eiho jouse dingle khonunga hung seilen ho jouse dinga hinna hiding ahi.

COVID-19 CHUNG CHANG THU CHULEH HETDIA POIMO PHABEP HO



Dr. Tingneo

ARTICLE

Novel corona virus (COVID-19) hi Hubei Province of China, Wuhan City, Sea-food market, December 2019 akon a hung kipan ahin tun vannoi gam 214 lang atongkha tan ahi. Hiche natnahi WHO in March 11, 2020 nikho ah chu pandemic (vannoi pum-pi kisu natna) a declared ana bol ahitan ahi. India ajong January 30 chun positive case ana kimudoh in tunichan in phatlam sangin setlam mano in case 1 lakh val ineitauvin ahi.



SYMPTOMATIC LE ASYMPTOMATIC SEIKHEN NA:

Covid-19 natna vei hohi hopni'n akikhen nin, hichu Symptomatic le Asymptomatic akitie. Symptomatic hohi anatna kihedoh thei tichu symptoms (nat kihetna) nei tina ahin ahinlah Asymptomatic hohi natna vei a-hia anatna kihedoh lou tichu symptoms ima um-lou, aveilam jong kihetlou, testing teng lebou result a kihedoh tina ahi. India a Covid19 natna vei hohi 80% tobang hi asymptomatic/mild symptoms ahiuve. Covid19 symptom hochu: Khosih (Fever), Khut (Cough), Lol nat (Sore Throat), Op-nat (Chest-pain), Eh-kho (Diarrhoea), Luchang nat (Headache), Hai khoplou (Shortness of breath), Hiche holah a common pen hi khosih (Fever) hi ahi.

Asymptomatic case chun-gchan:

COVID-19 vei jouse hin symptoms anei ding tina ahipoi. Mi jakhat vei lah'a 80% tobang hi symptoms neilou ahiuve. Hitobang natna neiho chu Asymptomatic akiti. Khangthah atamjo hiche natna vei ahia symptoms imacha neilou atam in ahi. Ajeh chu khangthah ho immune system hi ahen (akum tamjep) langho sang in ahat jep in ahi.

Ipijeh a quarantine center ahi ni 14 sung kikoi ham?

Research tamtah in amudungjui achu covid-19 hi ikilah apat a symptoms inei kah (incubation period) hi alhangpia ni 14 chan lut ahin, hijeh a chu ni 14 chan quarantine center a kikoi jiu ahi. Ni 14 sunga atahsa chung a symptoms ima akimu louleh natna vei lou tia simthei ahi.

COVID ivei leh aki damdoh kit nadem?

Covid-19 hi high transmission rate but low mortality rate akitin ahi. Hiche hin aseilom chu avei tamtah aum vangin athi lhomcha bou ahi e tina ahi. Gam jouse kigom a tuchan na covid-19 damlou na'a thi hi mi 100 lah a mi 3/mi 4 bou ahi. India ajong mortality rate alhom

in 3% bou ahi. Vetsahna'n Tuberculosis (TB) jong mortality rate 3% bou ahin covid19 toh kibang ahi. Chuleh kipa aum natah khatchu India a recovery rate (adamdoh) jong ahoiyn tuchan in 40% alhung in ahi. Tichu mi 100 vei lah-a mi 40 damdoh jouta tina ahi. Hijeha chu Covid19 natna hi alou aumlou vangin athi rate alhom in, adamdoh jong atam in ahileh lungneo nading leh kichat nading behseh aumpoi. Adeh in khangthah ho adamdoh vah uvin ahi. Keima tah duty kapoh sung injong hiche natna vei jeha thi khangthah koima aumpon ahi.

Alhangpia adamdoh joulou hohi co-morbidity tichu natna dang nei (diabetes, hypertension, heart disease, cancer, respiratory illness) holeh ahanlang (kum 65) ho ahinom jin ahi. Hiche jeh ahi inu ipateu, ahanlang ho ingailut nauleh ivendoh nathei napen uchu khangthah eiho ivei loudiu, ijemtia avei dia ikiginmo tah ujongleh amaho akan gamlha a ium diu hi damdoi phapen ahi.

Test kibol nading mun:

Hiche hi state wise a govt. in designated center apeh namun ho a kibol thei ahi. Delhi chuleh city lenjep holah avang private

Lab. ijat ham injong Rs. 4000-5000 lut in testing abol uvin ahi. District jouse a govt. hospital hohi alhangpia designated center ahi. Test kibol danhi thisan a kibol hilou in ilol toh inah a kibol ahi. Study dungjui a hichelai mun teni ahi virus kikhoh tam-pen ahi.

Covid hi ipijeh a transmission asang'e kiti ham:

Covid-19 kithejal danhi respiratory droplet akon ahin, dammo-na vei mikhat chu akhut (cough) ham, chil aset ham ahilouleh akam akon chil apot teng hiche droplet chu imit (eyes), inah (nose) ahilouleh ikam (mouth) ham a achuh teng hiche virus chu khat akon khat kilason ji ahi. Ahilouleh hiche dammopa droplets chu thil lelo chung-a achuh teng alhangpia virus 4-8 hours umden ji ahin hiche virus kivei namun chu atongkha jousen akhut ham, atahsa ham apat amit, anah, akamho atoh khah leh amaho jong veikit jithei ahi. Hijeh a chu covid-19 hi transmission asang e atiu ahi.

Hiche kivendoh nading a lampi hoipen chu khut phatea sop-theng jing ding ahi. Hiche jeh ahi ipot teng ahilou leh thil ineh kon ham leh khut phattah a sop ding guideline a kisei ahi. Hand washing phatah a akibol leh avei

honjong midang transmit abol lou diu chuleh aveilou hojong natahsa natoh khah masang a hand wash nabol le hiche virus chu nasung a alut masang a natha thei tina ahi. Hand washing steps hoitah a nabol leh 90% natna hu natha thei ahi.

COVID POSITIVE CASE KIJAN DAN:

Inlang ah thinglhang damdoi tamtah kijan dingdan isei uvin alhangpia ivet le immunity boost ding dan ngen ahidan kamu e. Hospital ah kijan dan ana veu hite. Symptoms neilou hochu achom a lou (medicine) ima aneh uh ngailou, atahsao asuh hat nading bou kineh sah uh ahi. Basically, symptomatic treatment bou kipeu ahi. Vetsahna'n fever neiho paracetamol chuleh cough neiho syrup kipe ji ahi. Covid virus hin lung (chop) ahatah khah pen in, hiche jeh hin aphot cheng in adamlou hohi oxygen level aki check jing in angaicha aum leh oxygen akibu peh jin ahi. Chuleh infection dang akon akiven nading in antibiotic le antiviral (oseltamivir) akipe jin ahi. Comorbidities (nantna adang) neiho vang akhohse jep jiuvin hijeh a chu hospital a phatea aum uva hoitah a anatna dungjui a akijen u angaiye.

Covid positive ho iti damdoh ham:

Achung a isei bang uva mi 100 lah a tuchan a 40 tobang damdoh ahijeh in mijousen aloula akisem doh naipon iti damdoh uham tihi iboipi pen uh khat chu ahi. Hiche jeh hin adamdoh dan gah veuhite. Vetsahnan, Viral fever ahilou le dengue fever (Delhi a common mama) jong khu alou aumlou mipi jousen ihet u ahin, hinlah atamjo damdoh ji ahi. Ajehe pentah chu itahsa sung ahi natna galsat ding antibody inei cheh uh ahin, hichun immunity ahatsah ahi. Mihem khat chu natna anei teng leh immunity (tahsa veng-tup) chu thakhat a nemsuh ji ahitan, nini nithum jouleh hiche antibody (tahsa sung a natna galsat) chu oltah a hung kistem a immunity ahin hatsah kitji a itahsa hung damdoh kitji ahi. Hijeh a chu Doctor hon adam-moho tahsa hatdan niseh leh kivesui jing ahi. Tahsa sunga antibody hoitah a akisem thei nading chuleh natna dang akon akiven thei nadia neh leh chah hoitah kibol a doctor hon lou angai dungjuiya kipe a ahiloule oxygen angai jongleh kipeji ahi.

Achaina dingin ihetsah u hijongle iti kiven ding ham ana sei ute:

1. Khutsop jing ding (step jouse jui ding): Hichehi apoimo pen ahidan ajehe achung a imutaove.
2. Mask kitom ding: Hiche hi adamlou ho ding a poimo pen ahin, mask kibol hin mitamtah hinkho aven doththei ahi.
3. Social distance bolding: Ipu ipa-u khang apat kingailu mite ihijeh un hiche hi ahah peh hiding in katahsan e. Ahinlah hiche natna kilah sondan ihet u ahitah jeh in, ikingailutnau vetsahna'a social distance phatea iju diu ahitai. WHO injong covid19 natnahi moh beilou ding'a ase jeh in, kivenna dia hoipen chu social distance hi ahitai. Atehan inu ipa ipi ipu ngailut najal a hiche hi ibol tei diuvin tem ahi.
4. Tuidon a itahsa suhnou jing ding: Twidon hi aphatcheng a poimo itahsa adia manlu tah jong ahi. Twi hi mihem-te adia damdoi khat ahijeh in twi hadon ding'in ikitem un ahi.
5. Immunity suh hat ding: Saa (meat) bou haneh khel angaipoi, anche, thei (fruits) hohi tahsa adia phatah jong ahi. Chuleh jaan imut jonghi immunity a dia poimotah ahin, mipil-hing khat pung 7-8 hrs mut tei ding ahi.
6. Bolding le bol-louding: Japi lah a chil mohsit bollou ding, chuleh hoilai hijongle ikhut (cough) tengleh ikam handkerchief ham tissue ham a tomding ahi.

Mission Column

*Rev. Lamkeng Lhouvum
Secretary Mission*

Thumakai

Pathen lungsetna na jal'a Kuki Baptist Convention tunichanin ikiman chah nao ama chal jingin Pathen thang vah in um hen. Hije chun tunin achesa Lha April leh May Lhasunga kimanchah nah o them khat kahin tahlang nomin ahi. Ichenao gamsung'a Covid-19 jeh in Gamsung pumpi Lockdown um jong leh Mission Board hon jong jo chanin kiman chahna akineijin ahi.

1. Elijah Prayer Mountain Gothol mun'a Kichen kisa.

Achesa April Lhasung'a Go -le hui kitho jeh'a Taona mol a Kichen Huijin amutset tah jeh in, Mission Board in gelkhomna akineijin Kichen aumsa hi aneovin chuleh ase ding kon ahitah jeh in athah beh'a sah doh ding gellahna akineitan ahi. Hiche sah doh na ding'a hin a) Missionary Thangkholun Kigen Head Mistry hina in, Missionary Mr. Chochon Haokip, Missionary Mangcha Haokip, Evangelist Jamthang Haokip chuleh Pu Zilkholun Care Taker amah o cheng kitho khomin inthah asaovin ahi.

2. Mission Board Tour Program 3rd May 2020

a) Saheibung B/C KBC No 7- Pathen lungset Mission Board in Tour program akineijin ahi. Sunday jingkah a hin Saheibung Baptist Church a Houin kaikhomna nomtah a kiman chahna akineijin ahi. Houbung miten Pakai min'a eina lam tout oh kilhonin ana neh tuidon eistem peh un ahi. Saheibung Houbung mite hin Tukum 2020 May Lha a kipamn'a Houbung mission sponsored khat hina din Lhaseh'a Rs. 5000/ pe dingin phondohna anei taovin ahi. Hiche nikho hin kum'a share jong Rs. 30,000/ ahin peevin chuleh Monthly support jong Rs. 20000/ ahin peevin ahi.

b) N. Boljang B/C KBC No. 7 Sunday sun hin N. Boljang Houbung'a akikal songin ahi. Houbung miten, Fasting Prayer aneiju toh kilhonin, kaikhom na program vang akineinthei tapon ahi. Hi jong Houbung lamkai hon eina lemun chadon khomna akineijin ahi. Chuleh Houbung miten jong Mission share ho jong ahin peevin ahi. Pathen in Houbung phat theiu boh jing taohen.

c) Khoken Baptist Church KBC No. 7- Sunday nilhah in Khoken Baptist

Church a kiman chah khomna akineijin ahi. Houbung mite toh Mission natos kithokhom ding thu a ki houlimna akineijin ahi. Chuleh Nilhah an neh tuidon jong kitup tah in Houbung hone i bol mpeh un ahi. Pathen in Houbung phat thei boh jing taohen.

3. Mission Board in Individual Sponsored bol ho Vilna kineita.

Achesa nisim 5th May 2020 chun Mission Board Pu Thangkholun Haokip Vice Chairman lamkai na in Pu Haopu Singsit, Pu S Onkhomang Haokip chuleh Pu Haojakam Doungel ho chengin, Missionary Sponsored bol ho vilna leh taopeh na akineitan ahi. Hiche nikho hin KBC Centre Church B. Vengnom hon jingka Break Fast eina bol peh un kipah tah in eina lam touvin ahi. Chuleh Mission share jong eina peuvn ahi.

1) Miss Grace Them Haokip Centre Church B. Vengnom, amah o Electric Department'a natong ahin Pathen in natos phatah eipen tin aman jong nungah khangdong hoilai tah hin Individual Sponsored ahin bollin, Mission Board hon taopeh akineijin ahi.

2) Pi Nenem Haokip w/o Thanghem Haokip- Centre Church B. Vengnom amah in Pathen in Phat thei eiboh na a inum Bazar in akisan hichea kon'a Mission natos na kanei ahi tin Board in Taopeh na a kineitan ahi. Pu Thanghem Haokip a houlim na a chun Missionary ding'a kipedoh aum bang hin Mission sponsored di jong kipedoh ding hung tamcheh cheh leh ti kataona ahi ati.

3) Pu Seicha Chongloi leh Insung mite Centre Church B. Vengnom Insung mite jong Pakai phat thei boh chana kipa na jal'a Mission Sponsored hung pan ahi nao thu aseijun ahi.

4) Pu Chanthoi Ailmol ADC EM ama jong KBC Men Department Missionary Sponsored khat ahi. Amah in ADC ahung kai doh thei kipana jal'a Mission sponsored hung pang ahidan aseijin chuleh tukum 2020 sung'a jong kipah tah'a kapan jom ding ahi atin ahi.

5) Women Department Centre Church B Vengnom Houbung sunga Department tampi um jong leh C/C B Vengmon Nute jong kipah tah in sponsored khat in ahung pangun kipa thu aki phongin ahi.

6. Taona mol vilna Individual Sponsored bolho visit akibol na ban'a Centre Church S Canaan Veng, Gambih No. 8 Gambih centre ho jong vilna ahung kineijin ahi. Chuleh nilhah lamin Taona Mol'a akichen, Missionary ho natos ho vil lhahna akineijin ahi. Chuleh Mission Baord member Pu S Onkhomang Haokip in Bongsakg 7 acho in natong ho ana neh khom pina akineijin ahi.

Houbung leh Individual Mission sponsored bol ho:

Houbung min'a sponsored bol ho hi alhang pia Convention in ama ho share akipeh chung chon'a Mission natos pohnatna jal'a sponsored hinbol ahiuvn amaho chung'a kipathu sangtah in akiphongin ahi.

Tuchan a Mission Share kimuho anojia hin kahin tahlang in ahi.

(Report from 13/01/2020 to 5/06/2020)

Sl. No.	Name & Address	Lha'a/Kum'a	Apehdoh jat	Avat nalai	Remarks
1	T.Champhai Baptist Church, KBC No.8	18,000x12=2,16,000	36,000	1,80,000	
2	Lonpi Baptist Church, KBC No.21	15,000x12=1,80,000	30,000	1,50,000	
3	Gl. Thangminlen Touthang C/C New Lambulane	10,000x12=1,20,000		1,20,000	
4	Khoken Baptist Church, KBC No.7	10,000x12=1,20,000	50,000	70,000	
5	Khudengthabi Baptist Church, Gb.15	8,000x12=96,000		96,000	
6	Zomi Villa Baptist Church, Imp.	7,000x12=1,20,000	7,000	1,13,000	
7	Pu Chanthoi Aimol	6,000x12=72,000		72,000	
8	Pi Nenem, C/C B.Vengnuom No.8	5,000x12=60,000	24,000	36,000	
9	Pi Juliana Doungel, C/C New Lambulane KBC No.1	2,000x12=24,000	50,000	-26,000	Apeh val
10	S.Saheibung B/Ch. KBC No.7	5,000x10=50,000	20,000	30,000	
11	Pu Seicha Chongloi, C/C B.Vengnuom KBC No.8	4,000x12=48,000	16,000	32,000	
12	Pi Chinneivah Haokip, Moreh B/Ch KBC No.15	3,500x12=42,000	7,000	35,000	
13	S.Molcham Baptist Church, KBC No.8	3,000x12=36,000	18,000	18,000	
14	Pi Vahneihing Haokip, C/C Molnoi Area No.16	3,000x12=36,000	12,000	24,000	
15	L.Sareikhong B/Ch. KBC No.2	3,000x12=36,000	12,000	24,000	
16	Pu Demsei, Moreh B/Ch No.15	30,000	15,000	15,000	
17	C/C B.Vengnuom, W/Dept.	2,000x12=24,000	10,000	14,000	
18	Evan.Hemlun Haokip, C/C Langol No.1	2,000x12=24,000	10,000	14,000	
19	Pu Haopao, Moreh B/Ch No.15	2,000x12=24,000	10,000	14,000	
20	Jalenbung B/C Gambih No.2	2,000x12=24,000		24,000	
21	Pi Lucy Lenthang, C/C New Lambulane	2,000x12=24,000	10,000	14,000	
22	Pi Kimneihoi, Khopijang B/Ch No.21	20,000	20,000	-	Apelthing tai
23	Pu Seikholon Haokip, Aibol Joupi-13	1,500x18,000		18,000	
24	Pi Hatkhohling, Gamphajol B/Ch. No.14	1,000x12=12,000	10,000	2,000	
25	Pi Mawite Doungel, C/C New Lambulane No.1	1,000x12=12,000	12,000	-	Apelthing tai
26	Ng.Grace Them, C/C B.Vengnuom No.8	1,000x12=12,000	4,000	8,000	
27	Pu Thangkholen Haokip, L.Sareikhon B/Ch. No.2	1,000x12=12,000	1,000	11,000	
28	Pi Panem, C/C New Lambulane No.1	700x12=8,400	2,900	5,500	
29	Pu Thenkholal, Twilelon B/Ch.No.12	6,000	6,000	-	Apelthing tai
30	Pi Palhing Chongloi, C/C New Lambulane No.1	500x12=6,000	3,000	3,000	
31	Pi Nengja Khongsai, Lonpi Khonou B/Ch.No.21	500x12=6,000	1,000	5,000	
32	Pu Hemlun Haokip, Haolenphai B/Ch No.15	2,000	2,000	-	Apelthing tai
33	Mr.Chonlal Kipgen, C/C Kangpokpi No.5		3,000		
34	Pu Ngamthang Kipgen, S.Phailengkot B/Ch.No.2	7,000	1,000	6,000	
Grand Total			4,02,900	11,27,500	

Amah o jouse chungga kipa thu iseijun chuleh koitobang hijong leh jo kham kham'a Mission partnership a sponsored a pang ho jouse chungga kipa thu sangtah in aki phongin ahi. Pathen in hong phal tah'a pan alah nao chungga phat thei boh jing tao hen.

Pathen KBC Gamsung'a Mission na itoh nao chungga Phat thei ei boh jing tao hen, Kakipah e

Pakaiya natoh khompiau

Rev. Lamkeng Lhouvum, Secretary, Mission & Evangelism

Men Column

Department Thudol Hetna

Rev. Tongmang Haokip

Secretary Men Department

Muntinna um Pate ho jouse le Houbung mite jouse nabon chaovin Pakai min Salam kahin bol'e. Pakai Lengpi leija tohkhompi Gambih a Pate Chairman, Secretary chule Work Committee chule Houbung tinna Pate Chairman, Secretary chule Work Committe ho chule muntinna Pate jouse; tukum Gamsung netchena Covid-19 jeh in Pakai Lenggam na etohkhomna jong ahinabang tah in na akitong thei tapon aphanho lhehenge hijongle Pakai lenggam natohhi vadung tuilong atanthei loubanga Pakai lenggam natoh jonghi atangthei ahipoi hijeh hin muntinna um Pate Pakai Lenggam na etoh'u amachal jingna thei dingin Office langa pehdinga lomho jouse hinpe dingin Pakai minin temna kahinuve.

Tukum sunga Pate khat in epehdingo:-

1. Member khatna Rs 100 (cheng jakhat) only chule Lom Resource munna natoh nadinga Pate khatin Rs 100 (cheng jakhatma) only agomma Rs 200 (cheng jani seh) only bou ahi.
2. Pate PMF fund peloulai jousen mikhat in Rs 200 chunglang cheh apeh ding koitabong Rs 1000 (sangkhath) chung lang pejouse kipaman na hetjingna Memento khatcheh jongpeh ding ahi.
3. Tukum sunga Gambih tinle Houbung tinna Pate in Angngol taona khatve cheh neiding Offeringhole Angolna Angchang manho Office langa thah chehding kitichu tuchanna hinbolho chung a kipathu akiseijin; chule tuni chan geija abollou laihon jong agenna thei penna ebolsoh keidingun Pakai min in temna kahin neije.
4. Tuni channa pehdinga lomho atamjon epeh nailoujehin; Pate in Misdonary mithum egoiho jong tunichan geiin sum akipethei tapoi chule Lom Resource Centre muna Care taker pajong lojong phaten akipethei tapoi; hijeh hin pehdinga lomhoi hinpe cheh dingin Pakai minin temna kahin neije.
5. Convention kivaihomna dol in July sunga half yearly Audit aumtah ding jeh in hiche masang ngeija hi pehdinga lom ho office lam a ipeh lut cheh diuvin Pakai min in temna le hetsah na kahin neije.

Tunichanna nakitongdohho:-

1. Lom Resource Centre munna Dt 8th May 2020 nin na akitong pan

in Aieng akitun Aieng Mon 10 (som) akituchai in ahi.

2. 12 May 2020 nin munchom choma Invilnale tilkhouna kineiho Pa Thangpao Haokip tahsa damlou vrtnale taopehna.

3. Pu Chanthoi Aimol ADC Member Chander & Family KBC Men Dept. Missionary Individual Sponsor bol kipa thuseina le taona.

4. Pu Thangson Haokip & Family vilnale taona Maicham chule ngailut Angkong sokhomna.

5. Pi Neikholam Haokip & Family vilnale tilkhouna taonaaicham

Aieng tuna dinga pan hinlaho :-

Amatahsa tah hung kon thei hihjungle Office lamma Secretary hon jong gelkhohna jalle Pathen natohna in nikhotha khat dingin Rs 500 (Five hundred) cheh ahinpeo vin achungcheh uva kipathu kahin phonge amaho chu :-

1. Rev. Dr M.Thongkhosei Haokip General Secretary .

2. Rev. Helkholam Lhouvum M/E Secretary

3. Rev. Onkho Haokip Dev.Co-Ordinator

4. Rev. Lhunkhosei Tuboi Youth Srecretary.

5. Pu. Khaijang Haokip Officeby Supt. chule

6. Pu. S.Angam Haoki C/C Salem Village Sapormeina.

Lom Resource Centre munna Pate natonga hungkonho:-

1. Dt 25th May nin Lhangjol Baptist Church Pate Gambih NO. 4 LRC muna Pathen ngailutnale Pate kiloi khomna ngailutnale Pate Pathen Lenggamna etohnao khantouna dingin natongin ahung konun achunguva seijou lou kipana sangtah kainphonge.

2. Dt 30th May nin C/C Salem Village Sapormeina Pate Gambih No.4 LRC munna Pate Pathen Lenggam natoh khan touna dingle Pate ekoikhomnao ngailutna jalinnoon no natonginvby ahungkonun achunguva seijoulouvin kipana sangtah kahin phonge Pathen Houbung Pate kiloikhomnao phatthei bohjing taken.

3. Tubanna LRC munna a muchi tubeding :- Aieng mon 10 (som) akituban nahi aphaatdung juija Betou Kg 40 (somli) tudingin amuna akikoi kitai chiche Batou muchi tudingin natong dingin mingaichat ahije Pakai lenggam madinga koitabang kipehna a jong atuthei dingin aume; amatahsa tah hungkon theihih jungle amakipehna kham2 summa ahinpeh a atuding mikihol thei ahi

Rev. Tongmang Haokip, Secy. Men Dept. KBC.

WOMEN DEPARTMENT COUNCIL KOUNA

Amun : KBC Office Chapel Hall
Anikho : 16 July, 2020 (Thursday)
Aphat : 11:00 am - 02:00pm

Council member dingho:

1. President nukhahpen
2. Secretary nukhahpen
3. Women Work Committee ho.
4. Gambih Women Chairperson, Secretary chule Treasurer.

Pakai lengpileija katohkhompi ngailut umtah nute lamkai ho amasan imunpiu KBC Office a konin kangailut na Salaam Pakai Christa minin kahin peuve.

Pathen lungsetna jal in keima jong damsel in MBC a ka term (kum 10) kahin chai jin May 6, 2020 nichun Pathen leh Convention phatsah na dung jui jin nute ho toh tongkhom kit ding in KBC Women Secretary hina ka la panthei jin ahileh Pathen kathangvah e. I hetsoh kei bang un tukum hi Covid 19 natna jeh in tuni chan in imacha jong akibol thei pen aumpon hijong leh Events calendar dung jui jin Pathen in phat pha eina peh u leh chung a kipe nikho leh mun a hi Nute Council itou diu ahi tia Pakai min na kou na leh hetsah na kahin nei ahi.

Hiche nikho le hin Office a pehdinga lom ho ipeh thei chan pedinga ihung kigot cheh diu vin kahin temuve (Membership Fund, Khutship, Anngol taona, Meithai nikho, Nute nikho, Talent le dang dang). Pathenin ikiloi khomnao KBC Women Department phat thei boh jing taken.

Damsel a Council itou theina diuvin taona in pan lacheh ute. Kakipah e.

Pakai lhacha,
(Miss Tingneilhing Kipgen)
Secretary, Women Dept, KBC

Youth Column

Rev. Seiboi Tuboi
Secretary Youth

Youth Employees Day thua hetsah le taona ngaichat

Amasan Gambih le Centre Church a Pakai lhacha Rev. Pastor, Chule Houbung tin cheng a Pakai lhacha Head Deacon ho jouse Pakai Jesu Christa min in kangailut nao Salam kahin pe cheh uve.

Tulai Vannoi yin aboipi natgim neitah chun eiho gamsung jong ahinpha tan, hiche jeh chun lhali lhanga tabong hi Pathen houk-hom na le Houin kai na hojong ina mang thei tapouvin hijong le Pathen lungset nale ngailut navang a phat pha phat hoi ina mu nah uva ahile, Kuki Baptist Convention Events Calender dungjui jin, ahung lhung ding July Date 12th 2020 Sunday nikho hi YOUTH EMPLOYEES DAY nikho chu hung hiditan, hijeh chun Houbung mi-ten jong hiche nikho hi Khangdong hojouse ngailut nale khohsah na neipum ma Pathen thu a til khou na le tao pih na a neina nit peh cheh diu vin Pakai min in kahung tao vin ahi.

Hiche to kilhon in noiya hung kitah lang tao na ngaichat naho jong kahin pen ahi

1. KBC Khangthah te din neihin tao peh un
2. Government Service bol khangthah te din neihin taopeh un
3. Company a natong khang thah ho adin nei hin tao peh un
4. Khangdong ho lah a lekha them ahung kisp doh be cheh cheh thei nadin neihin taopeh un
5. Pathen Houdan toh kitoh a jinei/Keingnei na anei thei nadiu vin neihin taopeh un
6. Khangthah mitam tah in natoh hoi natoh pha Government lam hihen adang dang a hijong le ahin mu thei nadiu vin neihin taopeh un
7. Khangthah Bible sim ho adin neihin taopeh un
8. Khangthah ho lah a Pastor le Evangelist chule Missionary ahung

kisepdoh bethei nadiu vin neihin taopeh un

9. Khangthah Missionary/Pastor/ Evangelist ho adin neihin taopih un

10. Khangthah mi Gampam ma Covid-19 jeh a genthei hasat thoh ho adin neihin taopeh un

Hiche to kilhon chun KBC Youth Department kithopi nale panpina ding in ijokham kham uvin Pakai min in Tolom jong kiphah tah in neihin tokhom peh uvin tia Pakai min in kahung taove.

Kakipah'e

Pakai le mipi lhacha

Rev. Lunkhosei Tuboi

Secretary, Youth Department

SHALOM THEOLOGICAL SEMINARY

2nd Graduation Cum Valedictory Service

Pathen mapuina mallin 2nd June 2020 (Tuesday) nikho in Kuki Baptist Convention (KBC) in Theological College inei sun-u Shalom Theological Seminary (STS) in 2nd Graduation Cum Valedictory Service chu STS Campus, Gamnom Sapor-meina mun ah ana kibol in ahi.



Hiche Graduation Program ah chun Speaker in Rev. Dr. Thongkhosei Haokip (General Secretary, KBC) apang in Chule Rev. Tonglet Haokip President KBC in Graduates ho dingin Vangboh taona amangin ahi. Office a kon in Secretary hon jong program ahung op uvin STS a dingin lungmon aum lheh in ahi.



Chule STS Thusim adia tuchung B.Th (Bachelor of Theology) Graduates hohi amasa pen ahung hitauvin ahi. Noiya Cheng hi tuchung Bth hin chai ho chu ahiu ve:

1. Mr. Gingoumang Kilong (Phoibih, KBC No. 4)
2. Mr. Kailenthang Kipgen (Keithelmanbi, KBC No. 5)
3. Miss Sobha Singh (Moreh, KBC No. 15)
4. Miss Ngaijalhing Kipgen (Phailengkot, KBC No. 2)
5. Mr. Manglal Kipgen (Sapormeina, EBC)
6. Mr. Manggougin Kipgen (Sapormeina, KBC No. 4)

Rev. Dr. Paokhohao Haokip
Director,
Shalom Theological Seminary

90th KBC EXECUTIVE COUNCIL KOUNA



Amun : C/C NGV, KBC No. 1

Anikho : 11th August, 2020

Aphat : 07:00 am

Jesu Christa jal'a them kachankhompi ngailut umtah KBC Executive Council member ho jouse, min lah'a minngei chungnungpen Christa minin kangailutna salam kahin bol uve.

Pathenin damna eipeh uva, thu le la aphot a ahileh ahung lhung ding nisim 11th August 2020 (Tuesday) nikho leh 90th channa KBC Executive Council umding ahi ti hetsahna le kouna ahung kineiijn ahi. Council member ho jouse ikiloikhom nau Kuki Baptist Convention ngailutna le khohsahna jal'a thonlouhel'a ihung pan cheh di-
uvin Pakai minin temna kahin neije. Boina ima aum louna dingin jong houbung mipiten taona in kop jing uhite.

Executive Member ding ho chu:

- 1. President le Vice-President,*
- 2. Department/Board/Committee a Chairman le Chairperson ho,*
- 3. Convention sunga Secretary jouse, HOD jouse,*
- 4. KBC Pay Worker jouse*
- 5. Gambih jouse a Chairman le Secretary jouse,*
- 6. Centre Church ho a kon thalheng mi 1 cheh,*
- 7. Men, Women, Youth Work Committee member mi 5*
- 8. Ex-President nukhah pen*
- 9. Ex-General Secretary nukhah pen*
- 10. Auditors*

Note: 1. Mun gamla ho chu lhunna, gena kigon peh ding ahi.

(Rev. Dr. M. Thongkhosei Haokip)

General Secretary

LHAGAO HINKHO PUI HING THEI THUGOLHO

01. Tunia hi mi minthang na hilou maithei ahi, lekhabu jih them na hilou maithei ahi, thusei them na hilou maithei ahi, mi hoi na kihisah lou maithei ahi, mi haosa nahilou maithei ahi, ahinlah nang chu nang na hin, Nang na hinapa hi phatea na manchah leh nikhat leh nang thu sim hi midanghon asah diu, ajih diu, aphondoh diu, ahinpi ding u ahi.

02. Na chamlhat nomleh na hinkho achesa sung'a chun kikulkhup den hih in. Vah na mu nom leh achesa na hinkho muthim lah chu dalhatan.

03. Na kholjinna lampia na kalsonbe nom leh na nung'a na poh pohgihho chu solhan. Midangho alohin nom lou uva, nang toh lam ahin jotkhom nom lou uleh dalha tan, nang hinkho chu aphapen in kisemtup chet in.

04. Na insung'a gucha na lutsah, adei dei na kilahsah louhel ding ahibang in na lungsung le na hinkhoa lunggel lamang theiho chu lutsah hih in.

05. Phulahna ding'a aphapen chu na dalhah thei jouse na dalhah'a hinkhoa na kal na son jing ding chu ahi.

06. Hinkhoa akipahpenho khu ahaopenho ahipouve, ahinkhoa kal-song jing theiho ahiuvin ahi.

07. Hinkho chesa chu achesa ahitan, ahung lhung ding chu phatea nana leim a na manchah ding bou vat ahitai.

08. Nang in phu nalah a chule thil kibol jouse na hinkhoa na chin den gunkei leh agenthei pen na hi ding ahi.

09. Hinkhoa hi thilpha jeng jeng kimu thei lou ahi, ahinlah thil soh jouse chu ipi jeh'a soh ham tia ajeh na het them leh hichea chu kihilna le chamna um kit ahi.

10. Thil jouse aphot jeh'a kipa ding ahapon, thil jouse sung'a thilpha hung doh thei ahijeh'a kipa ding joh ahi.

Office Thuchinbu

(May - June)

- May 02:** Pastor Mangcha Tuboi le Tujangvaichong Centre Church in KBC Secretary-ho ding in Papal ahin thot uvin thilpha lentah anabol uvin, Office akon in kipa thu sangtah in akiphong'e.
- May 15:** Elijah Taona Mol Gothol a Chaksang (Kitchen) thah kisa chu Rev. Dr. M. Thongkhosei Haokip, Gen. Secy. KBC in thensona ana neitai. Hiche kin achun Finance Secretary le Mission Board member phabep jong ajaovun ahi.
- May 21:** Covid-19 natna galsatna ding in KBC Workers jouse in nikho tha khat cheh atokhom uvin abonchan CM Office, Imphal munah CM Relief Fund ah ana pelut tauvin ahi.
- May 24:** Inpi Chamber of Commerce Society (ICCS) tohgonna noi'a Kukite chenna gamsung vaichat galsatna ding'a Manipur, Nagaland le Assam gam'a Houbung lamkaiho toh Zoom Conference (Webinar) kihoukhomna ahin gon utoh kilhon in Rev. Dr. M. Thongkhosei Haokip le Rev. Onkho Haokip in pan analahon in ahi.
- May 25:** KBC Finance & Property Committee Meeting, KBC Administrative Office mun'ah lolhing tah in ana um in ahi.
- May 26:** Pastor Mangjapao Haokip, Pastor, KBC Centre Chassad, KBC Gambih No. 17 chu March 16, 2020 nikho a Chassad khopi kihallhahna'a Kho le Veng kihallha hen lang ama gari jong kihallha jingleh Pastor khat hina jal in potdoh louhel in kho mite achenkhompi in, tahsa le lhagaovin mipi lungmonna le lhamonna chule taona le Pathen thu in alamkai jing in ahi. Chassad kihallhah apat lhani (2months) val jou in Pallel a um a insung mite phat chomcha villha ding in tuni (26.5.2020) nikho in, KBC Administrative Office mun'ah Office Secretary phabep in ana vailhun uvin ahi. Pakaiya dinga hangsan tah a pang

jing Pastor Mangjapao le Insung mite Pathen in alejatja in phatthei jing tauhen.

May 27: KBC Education Board Meeting, KBC Administrative Office mun'ah lolhing tah in ana um in ahi.

May 28: KBC Convention Executive Committee Meeting, KBC Administrative Office mun'ah lolhing tah in ana um in ahi.

May 29: KBC Office Staff Meeting, KBC Administrative Office mun'ah lolhing tah in ana um in ahi.

June 1: KBC Pension Board makaina in KBC Office munah Rev Khupthang Kilong Superannuation Pension Ihahdohna kingon ana kibol in ahi. Rev Khupthang hin 2002 a patna KBC worker khat a hung lut ahi. Gambih No. 3, 16, 4, 9 Centre Church Salem Saikul chuleh KBC Gambih 7 ho ana pon ahi. Pathen in Rev Khupthang leh Insung mite phat thei boh jing tao hen.

June 2: Shalom Theological Seminary, Sapormaina Graduation aniveichanna kin lolhing tah in ana kichai in ahi. Student mi gup in Bachelor of Theology (BTh.) Certificate la hatman (Award) chomchek ana kisan uvin ahi. Rev. Dr. M. Thongkhosei Haokip, General Secretary speaker in anapang in, Rev. Tonglet Haokip, President, Rev. N. Baite, Board Chairman chule Office Secretary-ho in ana op cheh uvin ahi.

June 2: Sapormaina a um Pu Letkholun Haokip in KBC Office Secretary-ho le staff jouse ding in anchang KG 100 ana pen, hitobang hahsat genthei laitah'a hou natongho agelkhohna Pathen in alejatja in phatthei boh jing hen.

June 5: KBC Secretary phabep le Office staff phabep jaoa in gari thum le Public Carrier khat dimset Relief thil dimset po in Chassad houbung le khomite vilna ana nei uvin ahi.

GAMBIH LE CENTRE CHURCH THU LAHKHOM (May - June)

May 8: Gl. Jangkholet Lhanghal le Ng. Nengneichong Vaiphei in Rev. Thanglen Haokip, Pastor Gambih No. 15 khut'ah Moreh Baptist Church mun'ah Pathen hou dan theng'a kikhutsuina ana neilhon tai. Pathen in insung nom pe lhon hen.

May 8: Govajang Baptist Church, KBC No. 11 a um Ng. Nengjahoi Mate chu Rev. Pillar Paosei Haokip, Gambih Pastor in houdan theng'a jinei thei ding in lhahdohna le vang thumpehna ana neitai. Pathen in phatthei boh jing hen.

May 9: Twilelon KBC No.12 Gl.Thangboi Khongsai leh Ng. Nengjahoi Mate in Pastor Lungkhongam Haokip, Gambih Pastor khut'ah Hou dantheng'a kikhutsuina ana neilhon tai. Pathen in insung nom pe lhon hen.

May 10: Centre Church Singngat in Nute nikho lolhing tah in ana mang uvin ahi. Ms Lhingboi Kipgen, Women Secrtary le Ms. Pretty Lhingneilam Haokip, Evangelist in Pathen thua ana lamkai lhon in ahi.

May 10: Nute nikho ahitoh lhon in KBC houbung phabep in ama ama houbung mun'ah ahithe dan dan in Nute Nikho ana mang uvin ahi. Lockdown laitah ahijeh'a mun tin'a kikhopkhomna aum theilou jeh in Pi Lhingbem Haokip in Nute Nikho Sermon online in ana sei-yin ahi.

May 10: KBC No. 20 Nuten Molpi B/C mun na 2020 Joint Mother's Day lolhing tah in akimang in "pakai ging jing numei" ti Thupi a pan-san Gambih Pastor Mangboi Kipgen in asei jin nuten lungthim sung'a halna nasatah ana nei uvin ahi.

May 11: Vangset umtah in Kotlen Baptist Church KBC Gambih No. 6 aum Pu Lalpao Kipgen Ex. Gambih Chairman in Pa koma choldo ding in eina dalha tauvin Pastor Letminlal Khongsai, Gambih Pastor in vuilemna ananeitan ahi.

May 12: Vangset umtah in Kotlen, KBC No. 6 a um Pu Lalpao Kipgen leiset hinkho anabei tai. (L) Pu Lalpao Kipgen achesa phat sung'a

KBC No.6 sung'a Gambih Chairman khat jong ana hi in, adalhah in-sung mite din taopeh cheh ute.

May 12: Kangpokpi Dist sung'a Kalaphar PHC munah KBC Gambih no 5 in Thinglhang me Relief anapeuvin Pastor Rev Letpu Kipgen, Pastor Centre Church KPI in Staff-ho dingin Pathen hengah Taona amang in, Dr Pilhing in Kuki Baptist Convention chungah staf-ho jouse thalheng in kipathu aphong in ahi.

May 13: KBC Gambih No. 7 a um houbung phabep: Khoken.Baptist Church, S.Shaheibung Baptist Church, N.Boljang Baptist Church., L.Jangnomphai Baptist Church chun Sangaitheh, Karong le Ka-chikhul munhoa thinglhang anme hopdohna ana nei uvin, thilpha an abol uvin ahi.

May 13: Kipa umtah in GL Lunkhongam le Ng Nengjoujam in Pastor Tonglal Haokip kinthempu hina in Tuingamjang Baptist Church, KBC No. 9 ah Hou Dan theng in kichenna ana neilhon tai. Pathen in insung nom semdoh ding in phatthei boh lhon hen.

May 14: KBC Centre Church B. Vengnoum, KBC No. 8 chun Quar-entine Centre a clients ho din twi theng (mineral water) thei 2000 Houbung min in Mini Secretariate, Peace ground, Churachandpur a pehna ananei uvin ahi.

May 15: KBC Gambih No.16, Molnom Baptist Church a um Gl. Jang-khothang Haokip in hinkhoa kichenpi dinga alhen Lamka Molnom ECA Church a um Ng. Nemneivah Haokip Hou DANTHENG a kichen-na kingon chu lolhing tah in Gambih Pastor T.Thangkhomang Ha-okip khut a Apa, Acha chule Lhagao theng min in janggop na kin chu Molnom Baptist Church KBC No.16, mun a Pathen jal in ana chelha tai, Pathen in ama ni vang le ham chule phatthei na hin pe taken.

May 15: Songjang Baptist Church KBC Gambih No. 6 Women De-partment in akiphudohna kum 72 lhinna chu ana mang un, MsTing-neilhing Kipgen, Women Secretary, KBC Speaker in apang in, Pas-tor Letminlal Khongsai, Gambih Pastor in lhakehtasaho geldohna phat alan, Pastor Henkhomang Tuboi, Pastor KBC Center Church Tu-jangvaichong in Nute vangthumpehna anei in chule Rev. Satminlen Khongsai, Pastor KBC Gambih No. 2 in houlimna phat khat amang in ahi. Pi Hatneilam Haokip, Vice President, Women Dept. KBC in jong kin aga op in ahi.

May 15: Vangset umtah in GL Chungkholun, Mata Lambulane, KBC No. 9 chun tahsa hinkho eina mollem san tauve. Pathen in adalhhah Insung mite lungmon na petauhen

May 18: KBC Centre Church M.Thingjabuong, KBC No. 8 chun Quarantine Centre, Peace Ground mun ah ₹ 7,000/- Tuibong SDO khut ana peuvin ahi. Chuleh Houbung sunga hopding in Masks ₹ 3,000/- man achouvin Houbung mipijouse ana hoppeh uvin ahi.

May 22-24: Govajang Baptist Church, KBC No. 6 mun'ah Gl. Haoneo Baite instructor hina in Music Training ana challah in ahi.

May 24: Sajik Tampak Quarantine Center mun'a umho ngailut na jal le ahahsatnau hetpehna in YOUTH WORK COMMITTEE KBC No. 12 hon ann me gam sung'ah agahol un Task force ho khut ah peh lut na aga nei un ahi.

May 24: Kangpokpi Dist Headquarter munna Corontine Centre mun nga a um mi 200 dingin KBC C/C Kangpokpi in nilhah Anneh ding anagon peh un amun cheh ah anathah peh un, Chuleh Church Pastor in tilkhouna leh Taopehna anei in ahi.

May 24: Molpheitampak Baptist Church, KBC No. 8 a Board of Deacon-ho le Haosapu jaonan Unique Public School T. Munjang le St John School Gothol munna Quarantine centre teni vilna ananei uvin taona le thilpeh jong ana nei uvin ahi.

May 25: Vangset umtah in (L) Thangneikhup Hangshing, Khomun-nom Haosapu, Ukhrul District in tahsa hinkho in eina dalha tauvin ahi. KBC sung'a haosa khat ahinale ngailutna jal in Rev. Lamkeng Lhouvum, Rev. Henjalen dounge, Rev. Onkho Haokip le Pastor Seiminlen Haokip in KBC thalheng in houlimna le ponkhuna ana nei uvin ahi.

May 26: Vangset umtah in Pu Thangsats Misao (1945 - 2020), s/o (L) Haokholal Misao in Delhi khopi mun ah tahsa hinkho eina mollem san tauve. Nat le sat jeh a hahsat pet hijongleh Delhi khopia um sopi ulenao hon nasatah in ana boipiuvin 2pm don in Dwarka Christian Cemetery, Delhi mun ah Rev. Paokhosei Kipgen, Pastor, KWSD in vuilemna ana neitai. (L) Pu Thangsats Misao hi KBC Centre Church, Kangpokpi member khat ahi.

May 27: Vangset umtah in Pu Seikholal Haokip, Head Deacon, Jangmun Baptist Church Gambih No. 11 chu atahsa damlou na akon damdoh jou talou in angailut aji le ainnsung mite le houbung mite dalhah Pa heng ah anachemasa tai! Ama hi Gambih No. 11 a Men Department treasurer jong ahipet ahi. Pathen in adalhah aji le ainnsung mite le ahoubung mite lhungmon nan um pe hen!

May 27: Centre Church B. Vengnom a um Evan. Pretty Lhingneilam Haokip chu Rev. Lunjalen Khongsai kinthempu hina in houdan theng'a jinei ding in lhahdohna le vang thumpehna kin lolhing tah in ana um tai.

May 28: Kipa umtah in Pastor Seikholen Kipgen leh Evangelist Pretty Lhingneilam Haokip chu Pastor Ngamkhopao Lhungdim, Gambih Pastor kinthempu hina in T. Thangkan Baptist Church (KBC Gambih No. 19) mun'ah Hou dantheng in janggopna ana neitan ahi. Pathen in amalam hinkho hon a mapui jinghen lang chuleh alenggam machal na din pahththei boh jom jing hon taken.

May 31: Govajang Baptist Church, Gambih No. 6 mun ah tahsan thah gollhang mi get in Pastor Letminlal Khongsai, Gambih Pastor khut ah Tahsan Twilutna ana nei tauvin ahi.

May 31: Pentecost nikho ahitoh kilhon in muntin'a houbung phabep in kikhophkomna ana nei uvin ahi. Lockdown laitah ahijeh'a mun tin'a kikhophkomna aum theilou jeh in Rev. Dr. Paul Paolen Haokip in Pentecost Nikho Sermon online in ana seiyn ahi.

May 31: Centre Church, Salem village Sapormeina a numei 18 le pasal 16 in Rev. Ngulkhopao Haokip, Church Pastor khut'ah tashan twilutna ananeiyuvin ahi.

June 2: Vangset umtah in Pu Ngamkhopao Haokip, Phalbung Haosapu (KBC Gambih No. 16) in Shija Hospital, Imphal munah akijenna akon damdoh jou talouvin tahsa hinkho in eina dalha tauve. Akhoh-tah khat chu a-in neipi Pi Neikholam jong April apat Heart problem jeh'a alha lha'a ICU a um a hung kijen jing ahin ainneipu thi hi kihet-sah loulai ahin muntin'a Houbung mite in (L) Pu Ngamkhopao Haokip in adalhah insung mite lhamonna ding le a in neipi damdohna ding in taonan kop jing ute.

KUKI CHRISTIAN-HO THUSIM'A AMASAPENHO

(Lhakit leh banjom ding)

01. Kukite Association a ahung kipoh jou un Motbung chu KBA Centre masapen in ana nei un chule Yaingangpokpi chu Phaicham Centre in anamang un ahi. Hiche Center teni sahdohn ding chun American Baptist Mission le CBCNEI a kon in kithopina masapen Rs. 12, 000/- cheh ana kimu in ahi.

02. Pu Ngulhao Thomsong chu Nagaland aumlai in 1908 kum in Baptize anachang tan Kuki Baptist Christainho lah'a amasapen in akihe jing tai. Pu Thangkai Vaiphei le Pu Lungpau Vaiphei chun Mizoram a kon a Pu Watkin Roberts toh 1910 kum a Manipur jon'a lam ahin jot lai un Pathen tahsanna ana neilhon tan, Twivai vadung'ah twilutna ahinneipa Ihon in Welsh Mission Presbyterian lah'a tahsan masapen ahilhon tai.

03. Kuki Haosaho lah'a Christian masa pen chu Pu Songjapao Kipgen, Tujangvaicong Haosa pu ahin Karong vadung'a December 12, 1914 nikhoa Tahsan Twilut ananei ahitai.

04. Kukiho lah'a Ukhrul Mission Centre a School anakai masapenhu chu: Pu Teba Kilong, Pu Longkhobel Kilong, Pu Helkhup Chongloi, Pu Yamkithang Sitllhou, Pu Tongngul Gangte, Pu Dengkhup, chule Pu Thangneilal ahiuve.

05. Pu Longkholel Kilong chu Kuki Baptist Christianho lah'a Evangelist le khutsut La sem (Composed) masapen ahin "Hung pontho uvo, Sopite Pap sopthengna Karong dung" ti la ana bol masapen in ahi.

06. Kuki Baptist Christianhon 1915 kum in Karong mun'a Christmas masapen ana mang uve.

07. Pu Lhingkhosei Kipgen le Pu Let-am Kipgen, Tujangvaichon chu Rev. U.M. Fox in suhdetna ana nei toh Ihon in Kuki Baptist Christianho lah'a Houbung Pastor /Deacon masapen ahilhon'e.

08. 1957 Kuki Baptist Christian ho lah'a "Leadership Training" masapen Tujangvaichong Houbung mun'a ana kibol'e.

09. Pu William Petigrew in Ukhrl mun'a Kuki School chapangho sam anavo lhah peh chu Kuki Tuhbem som chate Christian ahung hi jou uva sam kivo masapen anahiuve.

10. 1915 kum'a Tujangvaichong mun'a Mission School ana kipe chu Kuki kho lah'a L.P. School ana kipe masa pen ahi.

LHAGAO HINKHO PUI HING THEI THUGOLHO

01. Ama chu um hih leh ka kipana jong tam nante, ka boina jong um-ponte tia akiseina atam e. Ahinlah amaho jeh chun na hinkho chu sei-set ding go hih in, koi um jongleh kal sonbe jing in.

02. Midang na oimo gunkei leh koi in ajo em? Amahon ajouve. Nang in kal na son leh kon ajo em? Nang in na jo ahitai.

03. Na hinkho hi leisetna dinga Project lenpen ahi.

04. Eima hi eima dinga Hilkung (Teacher) le Zillai (Student) kihi cheh ahi.

05. Pathen mite ding in mu athim chan in avah'u akilang doh cheh cheh in ahi.

06. Computer le Phone-ho ahung ngongkaiya chule ahung boi tengleh Rebooth akibol ji bang in, hinkho jong tahsa le lhagao Rebooth bol'a kithah pat (Restart) ding ahi.

07. Abraham in Lot akikhenpi phat in Pakai in thu ahinseiye akiti bang in na hinkhoa Lot (Na hinkho sunohphahho) na kikhenpi ngap chat tengleh Pathen in na jahsahnom tamtah um ding ahi.

08. Hinkho hi patepna le themvetna mun ahi. Hiche patepna chu ei-hon isim lou beh'u themvetna mun ahi.

09. Office natohna'a mopohnaho ahichet chet'a suh bulhing ding akideiyin, phat phatah'a peh ding akidei cheh in ahinlah eima ding, insung ding le Pathen ding in ahichet chet in hinkho ana kimang dohji pon, aphamo chu ahi.

10. Mi tamtah in kholai len ding le midang toh kivop ding bou agel uvin insung mite toh kivop ding agel pouvin ahi.

MEDICAL CHAPLAIN

NATOH DING DAN LE MOPOHNA DINGHO

(2241/CEC-KBC/2020)

I. Natohna Mun Hop | Area of Operation

1. Imphal sung'a Hospital le ngaichatna mun danghoa tahsa le lhagao-va damna ngaichaho lah'a kimang cha ding ahin, ham le pao boina neiho le Hospital mun'a kisudongho aboipi ding ahi.
2. Gam sung, ahideh'a KBC sung'a dammona le hahsatna toh mi jouse ding'a panla ding ahi.

II. Boina mun'a panlahna | Crisis Intervention

1. Dammo veiset chule thina manna tohho le insung mite tahsa le lungthim chule lhagao hinkho lungmonna, lhamonna le taona anei theina ding uva Pathen thua tilkhouna anei ding ahi.
2. Sun hihen jan hijongleh chule Office timing hihih jongleh akhoh dungjuiya pan alah ding ahi.

III. Dammote le midang tilkhouna | Counsel Patients and Staff

1. Tahsa dammona neiho chu lhagao thua hilna le tahsa damtheina akon Pathen thangvahna ding le Pathen natoh ding dan ahil them ding, kipahtah a hinkho aman theina ding'a houlimpina anei ding ahi.
2. Tahsa dammona neiho insung boina le lungthim boinaho angailhahpeh'a chule boinaho akon akiledoh theina ding'a taona le kithopina anei ding ahi.

IV. Kintheng bolpehna | Perform Ordinances

1. Ngaichat ahidungjui le ahitheis dungjuiya taokhomna, Pathen houkhomna le Bible study abolkhompi thei ding ahi.
2. Akhoh dungjui le amopo thei midang umlouna mun'a thivuina le twilutsahna chule Pakai Anjon abol thei ding ahi. Hiche hi Licentiate/Ordain Medical Chaplain ho in abol thei ding'u ahi.

V. Viljingna | Regular Visit

1. Akhoh dungjui le ngaichat ahidung jui'a vilna ngaichaho avel'a avil thei ding chule ahahsatna hihen adamtheinau hileh hetpehna anei ding ahi.
2. Ahinlah ichangei ham khat a boina lentah ahilou leh vel khat kalval a villou jong hitheis jeng ding ahi.

VI. Midang toh kijahmatna | Liaise with Religious Community

1. Chaplain hin amun amun'a Pastor-ho le houbungho chule Hospital mun'a natongho toh kijamat'a boipi thei dingho jouse aboipi ding ahi. Boina neiho chu aboinau ahethdoh'a hicheho chu ipiti kimaitopi thei ham tiho akholdoh ding ahi.
2. Akhoh dungjuiya Dammona neiho le Hospital natongho chule KBC Office lang'a palai a pang ding ahi. Akhoh dungjuiya dammona neite kithopina thei lampi (mi, sum le pai, thisan) ahol thei ding ahi.

VII. Dammote venbtina | Privacy and Patient Confidentiality

1. Akhoh dungjui le amaho phalna a dammona le boina tohho thudol le lim chule thuchen dangho social media a tahlang thei hiding ahi.
2. Phalna kithum'a anomlouho le mimal hinkho thusim midang het ding'a phachomlouho le mimal hinkho suminsetheihoh vang mipi het ding'a tahlang lou ding ahi.

VIII. Sumlepai dinmun | Finance

1. Tahsa dammo Imphal sung'a Hospital'a hung kipolut (Hospitalized) vetna mi khat a Rs. 1,000/- hiding ahi.
2. Hospitalize hilouho jochan'a lhaipi ding ahivang'a sum le paiya vetna um lou ding ahi.

IX. Che le va le na | Transportation

1. Vangsetna jeh'a Imphal khopi sung'a thina manna toh denho long-damsa ama ama immun cheh'a thahlutna ding'a KBC Ambulance kimang cha thei ding ahi. Hiche tailouva transportation dangho hi ama ama insung mopohna hi ding ahi.
2. Ambulance kisolna a akhoh dungjuiya Chaplain soltha thei hiding ahin, hiche tailouva mun khat a mi galah ahilouleh mi ga thah tiho hi um lou ding ahin, ama ama insung mopohna hi ding ahi.

X. Kilamkaina | Guidance

1. Medical Chaplain hi KBC Holistic Development Committee vetsuina ahideh'a Coordinator in monitor/guide abol ding ahi.
2. Hiche chung chon'a akhohna le ngaichat ahi dungjui'a General Secretary le Finance Secretary kom'a thulhutna le kijahmatna um ding ahi.
3. Office staff working day hi Monday to Friday hijongleh Madical Chaplain hi dammo veiset dungjuiya panla ahijeh in ahithe channa Saturday le Sunday hijongleh pan alah ding ahi, ahin hiche nikho tenia hi kinkhoh anei leh lamkaiho toh kijahmatna dungjuiya kal song thei ding ahi.

KBC AMBULANCE GUIDELINE

(2242/CEC-KBC/2020)



1. KBC Ambulance Gari hi KBC gamsung le mun dang dang'a mithi pohna a ki mang ding ahin alhangpia dammo veiseho pohna'a kimang lou ding ahi.
2. Ambulance Gari hi KBC houbung mi ahileh thao akisun'a chule driver kholsa apeh ding ahi.
3. KBC houbung mi hilouho ding'a Ambulance Gari man (hire) man hi lampi achom le asao dungjuiya um ding ahin, noiya bang'a hi chepi ding ahi.

Sl.	KM	Thao thunna	Maintenance	Driver	Helper
i	1-30	Rs. 500/-	Rs. 500/-	Rs. 500/-	Rs. 500/-
ii	30-50	Rs. 700/-	Rs. 1000/-	Rs. 500/-	Rs. 500/-
iii	50-100	Rs. 1000/-	Rs. 1500/-	Rs. 500/-	Rs. 500/-
iv	100 -150	Rs. 1500/-	Rs. 2,000/-	Rs. 1000/-	Rs. 1000/-
v	150 and abouve	-KBC Office a kihou dungjui le agamlat dungjuiya fix kibol-peh ding ahi			

4. KBC Ambulance hi Hospital Ambulance bang'a asung'a lou le ai chule Doctor le Nurse ijakai ninglhing'a um lou ahijeh in natna hoise chule natna kilason theiho/adamlou veiseho pohna a kimang lou ding ahi.

PASTOR GARI KIHALLHA ATHAH CHOHPENNA DING'A TEMNA

March 16, 2020 (Monday) nikhoa Chassad Khopi kihallhahna'a Pastor Mangjapao Haokip, Pastor, KBC Centre Church, Chassad gari Ecco Van, MN06L 8809 jong khenlouhel'a ana kihallhahna lungthim giltah in akipona in chule phamo akisa l'heh jeng in ahi. Chule Pastor-pa gari thu hi tuni chan in Sarkal lang akon injong imacha agingdoh hih laiyn ahi.



Houbung mite vilna le Pathen lenggam natohna'a akalsonna thei adang aumtah lou jeh in ama jong agenthei l'heh jeng tan chule tuchung thilsoh hi mitmo jeh le lhahsam jeh hilouva chi le nam kah thu jeh ahijeh in Convention Executive Committee (CEC) in atum-beh in lunggil tah in akigelkhom in Pastor-pa gari hi tahsan chate in jokham cheh sekhom'a ahitheh leh athahset khat choh peh ding in gellhahna akineiyin ahi. Hiche chohdohna ding hin KBC Workers jouse, houbung member jouse, houbung jouse le gambih jouse in eima lunglhaina kham cheh'a pan lakhom cheh ding in Pakai min in temna ahung kineiyeh.

Ijemtia pan ilahkhomnau sumlepai ana lhahsam behseh leh gari tah kichodoh joulou ding ahijeh in hakattah a hung pang cheh ding in avel in tem ihiuve. Pathen in alhachapu chung'a thilpha bol ding in eihoulimpi cheh tauhen!

*Rev. Dr. M. Thongkhosei Haokip,
General Secretary*

TAHSA DAMMO TAONA LE KITHOPINA NGAICHA

Pu Thangkhopao Haokip, Centre Church Tuibong, Churachandpur, KBC NO. 8 hi akal (Kidney) alangtogel'a dammo ahin, adamona kumkho jong anasot tan ahi. Damdohna ding in Manipur hihen lang Delhi (AIMS) hijongleh ana kalsong in ahinlah kinepna bang in damna lam amano thei pon ahi. Pu Thangpao hi Centre Church Tuibong a Houbung Secretary masa le tuletua Building Chairman jong ahi. Pathen lenggam na atohna kalsongbe thei talou le insung dinmun machal thei talouva aumjing lai in houbung mite in Pathen heng'ah taona in kop jing ute. Chule s sumlepaia panla thei thei injong ijo kham kham uva ikithopi thei u ahi. (Tuletua aumna Tuibong, CCPur, Mobile Number – 8837082309 | SBI A/C No31286898959. IFSC Code. SBIN0006182).

SHALOM THEOLOGICAL SEMINARY

Gamnom Sapormeina
Kangpokpi District, Manipur

ADMISSION NOTICE

Pathen lungset jalin Kuki Baptist Convention (KBC) in Theological College ibolu Shalom Theological Seminary (STS) mun a B.Th (Bachelor of Theology) ihinpat-uva pat a B.Th course a hung lut masapen (B.Th first batch) ho chu 2nd June, 2020 ni chun Graduation Service anakiman pi to kilhonin B.Th first batch ho graduate ahitauvin ahi. Chuto lhonin 2nd week of July, 2020 a kipan ding Next Academic Session a dingin B.Th simna ding admission akihong tan ahi.

STS a B.Th ibolu hi Senate of Serampore College (university noiya affiliation kilading ahitai. Hichehi, STS a kon a B.Th simchai hon aban a boilouva Senate of Serampore noiya B.D (Bachelor of Divinity) course asimpai jeng theina diuva kibol ahi. Chule Convention sunga houbung miho khoh sahna jal a, asimnom hon baichakhen a asimjou theina diuvn Fee jong mudang hoa sanga nemjo le lhom-

cha akigongin, chule sum le pai lam a lhasam deh set hon jong boi louva asimjou theina diuvin Scholarship jong akigongin ahi

Hijeh chun, numei hiehen, pasal hile B.Th simding jousen hahsa sa a mundang jot jot ngaitalouva, lung sa-ih louhel a STS ihin jot jeng diuvin temna le het sahna ahung kipe in ahi. Application Form hi STS mun ahiloule KBC Office a P.A nu Ng. Chongneo Haokip kom a kon a lah thei ahi.

Achen/ achaiya (thuchen) henom ho jousen anoiya kipe contact Number hoa hi lung sa-ih louhel a ihin doh chet jeng theiyu ahi.

1. Rev. Dr. Paokhohao (Haoneo) Haokip, Director/ Principal
7005525033/ 9089593092

2. Pastor Ginneo Haokip, Academic Dean - 7005017150

DAMMO VEISET THUDOL'A HETSAHNA

KBC in Medical Chaplain khat full-time a akinei toh lhon'a Imphal sung'a dam lou le hahsatna hung tohho jouse ama mopohna ahitai. Chule ama in avet jouse le aboipi jouse hi KBC pumpi min'a abol ahitai. Changval le min chom'a kivilna ahingal louleh Chaplain in avil jouva lamkai dang in KBC pumpi min'a ahung vil kit lou ding ahijeh in mipite in ana hethem cheh ding in temna le hetsahna ahung kineiye.

-Finance Secretary

CHASSAD KHOMITE VILNA

Nisim 5 June, 2020 nikho in Kuki Baptist Convention (KBC) le Kuki sung'a hou kiloikhomna phabep in Chassad khomite le houbung mite vilna le ankong sokompina ana nei uvin ahi. Khosung le houbung sung'a lamkai chomchomho le khomite toh toukhomna ana umin khosung kivaipohna lam'a haosaho le houbung lang'a Pastor le lamkaiho in khosung le houbung sung dinmun le hahsatnaho tahlagna anei uvin ahi.



KBC General Secretary le Kuki Christian Leaders Fellowship (KCLF) a Chairman chule Chassad Rebuilding Monitoring Group a member jong hi Rev. Dr. M. Thongkhosei Haokip in houlimna aneyin, nampi in Chassad kho mite angailut dan le akhohsah dan thu aphong doh in, khosung lamkaiho hihen houbung lamkaiho hileh Pathen lungdei hinkho mang'a Pathen bel ding in tilkkhouna aneyin ahi.

Rev. Tonglet Haokip, President, Kuki Baptist Convention (KBC) in KBC thalheng in houlimna aneyin, khosung le houbung mite lung dettah'a pan alahnau chung'ah kipa thu aphong in ahi. KIM le abahkaiho toh kijamato pum in Chassad khomite le houbung mite ding in pan akila jing in, Pathen phatsah ahileh Houin jong sahdoh teina ding lampi igon jing ding'u ahi. Khosung vaihomho in khosung vai phatea ahop uva chule houbung vaihomho in houbung'a phatea vai ahop ding uvin jong temn aneiben ahi.

Rev. Thongkholun Touthang, Finance Secretary in houlimna aneyin, Kuki nam pumpi le munchom chom'a houbungho in ngailutna jal'a ahin pehdoh'u thil hung kipo Truck (Public Carrier) khat dimset

phondohna aneyin, mailam'a jong houin sahna hihenlang chule khosung sahdozna ding hijongleh taona pum'a hatah'a pan lah jing ding thu aseiyin ahi.

Pu Khailun in Chassad haosaho thalheng in houlimna aneyin, inmun 140 lah'a 90 akisucham tan chule in kisaban agu ahang kitungdoh 51 alhing in Pathen phatsah ahileh gangtah'a sahchai ding tohgon aum jing'e atin, muntin'a nam mite kithopina ngaichat ahijing dan jong atah lang in ahi.

Rev. Mangjapao Haokip, Church Pastor, Chassad in houbung mite jouse thalheng in muntin'a um nam mite ngailut achan jingnau jeh in kipa thu aphong in, mailam'a jong taona to thoa Chassad khomite le houbung mite ding'a pan hinla jom jing nalai ding in mipite temna aneiben ahi.

Rev. Dr. Jangkholam Haokip, Vice Chairman, Council of Kuki Worship Service (CKWS) in CKWS thalheng in houlimna aneyin, Chassad kho hi 1913 vel'a British-te in map ana jihdoh uleh ana kapdohnauva ana um jingsa ahin, hiche lai chun akimvel'a kho le veng dang jong ana um hih laiyn, kholuitah ahi ati. Chassad kho hi athusim'a ka na jah'a Map a kana mua, aniveina'a March 16, 2020 nikhoa akihal lhahna lim Social Media-a kana mu ahin tunin amuntah ka hung chonlut thei in, khosung mite na hapan mama jeng uvin kipa aume. Tuban injong lungneo hih uvin, kingailu jing uvin, Pathen hatna song jing uvin chule vannoi'a um nasopite jouse uvin ka hin taopeh uvin chule ka hin dinpi jing uve tin jong aseibe.

Kho mite le houbung mite toh kiloikhomna kichaiyin Pu Ningam Siro, SP Kamjong le Pu Lanee Tao, OC Chassad chule Kamjong a um Pastor Alogel le Pastor Steward toh toukhomna le kihoulimkhomna ana nei uvin ahi. Rev. Tonglet in Khosung mite bitna le chendoh theina ding in Police-ho na hapan jing u angaiyin chule Houin kisahdoh theina ding in Kamjong a Pastor le houbungho hapan angaiye atin ahi. Rev. Dr. Jangkholam in Christiante in ikimaitopi diu gal kikhong (common enemy) tamtah inei'u aum jeh in eiho le eiho kah'a kihetkhehna theiho akon kikangse cheh ding in temna aneyin ahi.

Kamjong SP in khomite olmo louva achen jingna ding uva pan kila jing ding ahin chule kho mite injong Police thupehho nasatah'a tosot jing ding in temna aneie. Pastor Alogel le Pastor Steward in jong kho

mite nasatah in tilkhouna aneilhon in, Christiante hi ikingailut ding'u ichenkhom jing ding'u dol hijongleh Satan in nasatah in ikahlah uva na atong jing in, hiche Satan natoh hi taona to thoa isuhchimit ding'u ahi tin aseilhon in ahi.

Hiche kin achun Rev. Tongmang Haokip, Men Secretary; Rev. Helkholam Lhouvum, Mission Secretary; Ms. Tingneihing Kipgen, Women Secretary; Rev. Lunkhosei Tuboi, Youth Secretary, Rev. Onkho Haokip le Pastor Paolunlal Kipgen, Children Ministry Director le staff dang dangho jong ana jao uvin lam chom chom'ah pan na satah in ana la cheh uvin ahi. Chule tuchung Chassad vil theina ding'a Permit hinpe Kamjong SP le DC nu le muntin'a taona le jatchom chom'a pan hinlaho jouse chung'ah kipa thu sangtah in ahung kiphong in ahi. Phat chaina in mipi in dilsupum in taokhomna ana mang uvin houin leitoh ah ngailut ankong sokhomna jong ana neikhom uvin ahi.

BIBLE QUEST 2020



ORGANISED BY KBC YOUTH DEPARTMENT

PORTIONS : HOSEA TO MALACHI
LANGUAGE : THADOU-KUKI
EXAM CENTERS : ALL DISTRICTS
TYPE OF QUESTIONS : OBJECTIVE

DATE OF EXAM : 11th OCTOBER 2020, SUNDAY

PRIZES:

TOP 1 : Rs. 15,000 + Memento
 TOP 2 : Rs. 10,000 + Memento
 TOP 3 : Rs. 7000 + Memento
 TOP 4-10 : Leather Cover Holy Bible + Memento

Notes:

1. Koi Houbung mihile athanam jouse pangthei ahi
2. Exam Center hi District jouse le Eimi umna India khopi hoia kikoi ahijeh in nabolna thei ding mun nakilthen thei ahi
3. Application Form Rs. 30/- only napel a na uruna gamkaiya nakilath nathei akikhoje
4. Thuchen hetbe namhon KBC Youth Secretary Contact thei ahi.

Contact No. +91-8414919588

Why go anywhere else?

START HERE

ADMISSION OPENS (2020-2021)

Reports



COURSES OFFERED

B. Sc. Agriculture
B. sc. (agro-Forestry)
B. Sc. (Fisheries)
B. Sc. Horticulture
B. Tech. (Agri-Biotechnology)



SPECIAL FEATURES

- * Smart Classroom
- * Well-experienced faculty
- * State-of-the-art Laboratories
- * Hostel for both boys & girls
- * Beautiful & Safe environment
- * The only technical college in Hill Districts of Manipur



IMPORTANT DATES

- * Application form available from 20th April.
- * Last date of submission 31 July 2020

ELIGIBILITY

10+2 with PCMB/PCB with minimum 50% (45% for SC, ST, OBC & PH)

CONTACT US

FEEDS GROUP OF INSTITUTION (FGI)
Admission Cell, Hengbung, Kangpokpi
Manipur - 795129
8794073922, 7085211925

Application form and prospectus can be downloaded from www.feedsmanipur.org/feedscolleges



COVID-19 LOCKDOWN to kisai a
Convention makaina a Gambih pumpin pan nasa tah a
analah na lim lah phabepho



Post Regd. MNP/81
Regd No. 18134/88



**KBC Workers Donated one day wages
(Rs. 1,00,000/-) to CM Relief Fund (21/05/2020)**



KBC lamkai phabep in Pr. Mangjapao Haokip Office a ana lem u

If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173